

Ո Ր Ո Շ ՈՒ Մ N 68/6
/վարչական տույժ նշանակելու մասին/

«04» փետրվարի 2022թ.

ք. Վանաձոր

Հայաստանի Հանրապետության պետական եկամուտների կոմիտեի Արևելյան մաքսատուն-վարչության պետի ժ/պ Գոռ Բակլաջյանս, ուսումնասիրելով Գագիկ Տավարացյանի /անձն. AT0526581, քաղաքացիություն՝ Հայաստանի Հանրապետություն/ կողմից մաքսային կանոնների խախտում կատարելու վերաբերյալ նյութերը

Պ Ա Ր Զ Ե Ց Ի

Հայաստանի Հանրապետության քաղաքացի Գագիկ Տավարացյանի անվամբ 18.12.2019 թվականին թիվ 05100033/181219/0000599032 մաքսային մուտքի օրդերով «Ժամանակավոր ներմուծում» մաքսային ընթացակարգով՝ մինչ 17.12.2020թ. վերջնաժամկետով, ՀՀ տարածք է ներմուծվել VOLKSWAGEN-VENTO մակնիշի, PZ592ZP հաշվառման համարանիշի, 1993 թվականի արտադրության տրանսպորտային միջոցը:

ԵՏՀ խորհրդի 29.04.2020թ. N° 47 և նույն որոշման երկու փոփոխությունների՝ 11.09.2020թ. N° 79 և 05.04.2021թ. N° 25 որոշումների համաձայն՝ երրորդ երկրներից ԵՏՄ տարածք ժամանակավորապես ներմուծված անձնական օգտագործման տրանսպորտային միջոցների ժամանակավոր ներմուծման ժամկետը երկարաձգվել է մինչև 2021 թվականի սեպտեմբերի 30-ը:

Մաքսային մարմինն արձանագրում է, որ նշված ժամկետի ավարտից հետո Ծրագրում նշված ՄՄՕ-ն երևացել է որպես ժամկետանց պարտավորություն, ինչի կապակցությամբ լիազոր մարմինը ձեռնամուխ է եղել ՀՀ մաքսային օրենսգրքի 199-րդ հոդվածի ուժով հետագա արտահանման պարտավորության խախտման հանգամանքը բացահայտելու և համապատասխան վարչական վարույթ հարուցելու լիազորությունների իրականացմանը:

20.12.2021 թվականին հարցում է կատարվել ՀՀ ՊԵԿ Ներքին անվտանգության վարչություն՝ վերը նշված տրանսպորտային միջոցի սահմանահատումների վերաբերյալ տեղեկատվություն ստանալու և կողմին հայտնաբերման նպատակով, որին ի պատասխան ստացվել են համապատասխան սահմանահատումների պատմությունը և սահմանահատման տվյալները:

24.12.2021թ-ին Գագիկ Տավարացյանի նկատմամբ կազմվել է մաքսային կանոնների խախտման վերաբերյալ արձանագրություն՝ ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտման հատկանիշներով:

Վարչական մարմինն արձանագրում է, որ վարչական վարույթի շրջանակներում հարցումներ են կատարվել նաև ՀՀ ՊԵԿ աշխատակազմի մաքսատուն-վարչություններ՝ նշված ավտոտրանսպորտային միջոցի ձևակերպված լինելու, ինչպես նաև ՀՀ ոստիկանության

«Ճանապարհային ոստիկանություն» ծառայություն՝ նշված տրանսպորտային միջոցի նկատմամբ հնարավոր կատարված գործարքների վերաբերյալ տեղեկատվություն ստանալու նպատակով, որոնց ի պատասխան ստացվել են համապատասխան հարցման պատասխանները:

Ներկայացված նյութերի ուսումնասիրության արդյունքում պարզվել է, որ ՀՀ տարածք ներմուծված VOLKSWAGEN-VENTO մակնիշի, PZ592ZP հաշվառման համարանիշի տրանսպորտային միջոցը Բագրատաշենի մաքսային կետ-բաժնով ՀՀ է ներմուծվել 18.12.2019 թվականին և հետագա արտահանման պարտավորությունը չի կատարվել, մաքսատու-վարչություններում որևէ մաքսային ընթացակարգով ձևակերպում չի ստացել, նշված ավտոմոբիլի գրանցման, հաշվառման գործարքների վերաբերյալ տվյալներ չկան:

ՀՀ մաքսային օրենսգրքի 189-րդ հոդվածի 1-ին մասի համաձայն՝

մաքսային կանոնների խախտում է համարվում անձի կողմից կատարված անօրինական գործողությունը կամ անգործությունն, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող ՀՀ միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն:

ՀՀ մաքսային օրենսգրքի 199-րդ հոդվածի 1-ին մասի համաձայն՝

հետագա արտահանման պարտավորությամբ Հայաստանի Հանրապետություն ներմուծված ապրանքները և տրանսպորտային միջոցները սահմանված ժամկետում չարտահանելը կամ հետագա ներմուծման պարտավորությամբ արտահանված ապրանքները և տրանսպորտային միջոցները սահմանված ժամկետում Հայաստանի Հանրապետություն չներմուծելը՝

առաջացնում է տուգանքի նշանակում՝ խախտման օրվա դրությամբ այդ ապրանքների և տրանսպորտային միջոցների համար «ներմուծում՝ ազատ շրջանառության համար» մաքսային ռեժիմով նախատեսված մաքսային վճարների մեծության 50 տոկոսի չափով, բայց ոչ պակաս, քան 50 հազար դրամ:

«Եվրասիական Տնտեսական Միության մաքսային օրենսգրքի 264-րդ հոդվածի 1-ին և 5-րդ մասերի համաձայն՝

օտարերկրյա ֆիզիկական անձանց կողմից՝ Միության անդամ չհանդիսացող պետությունում գրանցված անձնական օգտագործման տրանսպորտային միջոցների ժամանակավոր ներմուծումը Միության մաքսային տարածք թույլատրվում է ոչ ավելի, քան 1 տարի ժամկետով:

Ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մաքսային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման»:

Վարչական վարույթի շրջանակներում կողմին ուղարկվել է ծանուցում նշանակված գործի քննության տեղի և ժամանակի մասին, վերջինս ներկայացել է գործի քննությանը՝ վարույթն իրականացնող մարմնին տալով պարզաբանումներ, ներկայացնելով ձեռագիր գրված Դ. Հակոբյան անվամբ ստորագրված գրություն և մեծահասակների ամբուլատոր բժշկական քարտից քաղվածք:

Կողմի ներկայացրած փաստաթղթի բովանդակության հետազոտությունից վարչական մարմինը գտնում է, որ այն չի կարող Դ.Հակոբյանին ազատել վարչական պատասխանատվությունից:

Ինչ վերաբերում է ներկայացված բժշկական փաստաթղթին, ապա դրանով չի ապացուցվել այն փաստը, թե Գ. Տավարացյանի բուժման ժամանակահատվածը ինչ ժամանակ է ընդգրկել, վերոնշյալ հիվանդության ախտորոշման պարագայում հակացուցված է եղել արդյոք ակտիվ գործողություններ կատարելը, ներառյալ տեղաշարժը: Վարչական մարմնին համար համոզում չի ձևավորվել՝ հիվանդության հանգամանքը արդյոք օբյեկտիվ խոչընդոտ է հանդիսացել ՀՀ ժամանակավոր ներմուծված նշված տրանսպորտային միջոցը վերահայտարարագրել մաքսային այլ ընթացակարգով կամ համապատասխան լիազորագրի հիման վրա ավտոքարշակի միջոցով արտահանել ՀՀ-ից՝ ԵՏՀ խորհրդի որոշմամբ սահմանված մինչև 30.09.2021 թվականը երկարաձգված վերջնաժամկետին: Այլ խոսքով՝ վարչական մարմնին չեն բացահայտվել առաջ եկած օբյեկտիվ խոչընդոտները:

Ըստ ՀՀ ՊԵԿ Արևելյան մաքսատուն-վարչության ՄԳ բաժնի ավագ մաքսային տեսուչի պատասխան-գրության՝ Գագիկ Տավարացյանի անվամբ ՀՀ ներմուծված տրանսպորտային միջոցի համար «ներքին սպառման համար բացթողում» մաքսային ընթացակարգով ձևակերպվելու դեպքում կառաջանային հետևյալ մաքսային վճարները. միասնական մաքսատուրք՝ 4,030,299 դրամ և բնապահպանական վճար՝ 57,385 դրամ:

Այսպիսով, վարույթի նյութերով հիմնավորվում է, որ քաղաքացի Գագիկ Տավարացյանը սահմանված ժամկետում չի վերաարտահանել ժամանակավոր ՀՀ ներմուծված VOLKSWAGEN-VENTO մակնիշի, PZ592ZP հաշվառման համարանիշի ավտոմեքենան՝ թույլ տալով ՀՀ մաքսային օրենսգրքի 199-րդ հոդվածով նախատեսված մաքսային կանոնների խախտում:

Վերոնշյալի հաշվառմամբ, գործով ձեռքբերված ապացույցների համակցությամբ վարչական մարմինը գալիս է այն եզրահանգման, որ սույն դեպքում առկա է մաքսային կանոնների խախտման հանգամանքը, ուստի, հիմք ընդունելով վերոգրյալը և ղեկավարվելով Վարչարարության հիմունքների և վարչական վարույթի մասին ՀՀ օրենքի 3-րդ և ՀՀ մաքսային օրենսգրքի 221-րդ հոդվածներով

Ո Ր Ո Շ Ե Ց Ի

1. Քաղաքացի Գագիկ Տավարաձյանին ՀՀ մաքսային օրենսգրքի 199-րդ հոդվածի 1-ին մասով սահմանված կարգով տուգանել իրավախախտման անմիջական օբյեկտ հանդիսացող ավտոմեքենայի նկատմամբ «բացթողնում ներքին սպառման համար» մաքսային ընթացակարգով, մաքսային վճարների մեծության 50%-ի չափով, այսինքն՝ 2,043,842 /երկու միլիոն քառասուններեք հազար ութ հարյուր քառասուներկու/ ՀՀ դրամ վարչական տուգանք (վճարման ենթակա գումար):
2. Որոշումն ուժի մեջ է մտնում կայացման պահից, այն օրենքով սահմանված ժամկետներում կարող է բողոքարկվել վերադաս մաքսային մարմին / ք. Երևան, Մ. Խորենացի 3/7/ կամ ՀՀ վարչական դատարան:

Սույն որոշմամբ նշանակված տուգանքի վճարման հաշվեհամարն է՝ 900005024055 /ՀՀ պետական բյուջե, կենտրոնական գանձապետարան, Արևելյան մաքսատուն-վարչություն, ԿՈԴ 29/:

ԱՐԵՎԵԼՅԱՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏԻ Ժ/Պ



ԳՈՌ ԲԱԿԼԱՅԱՆ